


Headline	Rangka kerja realistik penentu kejayaan Bajet 2013		
MediaTitle	Berita Harian		
Date	02 Oct 2012	Language	Malay
Circulation	192,982	Readership	1,521,000
Section	Nasional	Color	Full Color
Page No	26	ArticleSize	300 cm ²
AdValue	RM 10,118	PR Value	RM 30,354



Rangka kerja realistik penentu kejayaan Bajet 2013



**RAZAK RASHID
GHOWS**

razakghows@bharian.com.my

Adakah Bajet 2013 yang dibentangkan Perdana Menteri, Datuk Seri Najib Razak bajet pilihan raya seperti yang dianggap oleh banyak pihak? Itu antara persoalan yang kerap ditimbulkan kerana secara kebetulan pilihan raya umum akan diadakan tidak lama lagi.

Walaupun setakat ini ia masih spekulasi dan hanya diketahui Perdana Menteri, bajet itu tetap dianggap pihak tertentu terutama pembangkang sebagai usaha memancing undi.

Beberapa peserta Wacana Pasca Bajet 2013 anjuran Majlis Profesor Negara (MPN) di Kuala Lumpur semalam tidak berangapan sedemikian.

Bagi Profesor Datuk Dr Noor Azlan Ghazali dari Universiti Kebangsaan Malaysia (UKM), ia bukannya bajet pilihan raya.

"Saya sudah lama memerhati bajet dibentangkan kerajaan dan berpendapat elemen kesejahteraan rakyat sememangnya patut ada. Dari segi masa memang betul, bajet ini diadakan menjelang pilihan raya.

"Tapi jika ia diadakan menjelang Aidilfitri, apakah kita akan menamakannya Bajet Aidilfitri atau Bajet Deepavali? Apapun sudah pasti akan ada interpretasi politik mengenainya" katanya.

Dr Noor Azlan antara anggota panel dalam wacana bertajuk 'Bajet 2013 dan Transformasi Ekonomi Negara' yang di-

pengerusikan Pengarang Kumpulan Berita Harian, Datuk Mior Kamarul Shahid.

Tajuk kedua 'Mentransformasi Sosio Politik Negara' dipengerusikan Timbalan Ketua Pengarang BERNAMA, Datuk Zulkifli Salleh.

Seorang lagi anggota panel, Prof Dr Kamil Md Idris dari Universiti Utara Malaysia (UUM) pula berkata, soal sama ada ia bajet pilihan raya ataupun tidak, terserah pada pemikiran masing-masing.

"Kalau seseorang menyatakan ia bajet pilihan raya, begitulah ia," katanya.

Prof Madya Dr Madeline Berma dari UKM juga tidak melihatnya sebagai bajet pilihan raya dan berkata, terserah kepada rakyat untuk menilai bajet pembangkang yang nampak terlalu banyak memberi.

Hakikatnya semua pihak harus mengakui bajet adalah dokumen penting dan perancangan formal menjelang pencapaian Malaysia sebagai negara maju pada 2020.

"Namun, kalau terlalu banyak pemberian (seperti dalam belanjawan pembangkang), ti-

dak mungkin kita mampu mewujudkan masyarakat dan pemimpin kelas pertama. Dalam bajet pembangkang, tiada sekat. Dia nak hapuskan pinjaman Perbadanan Tabung Pendidikan Tinggi Nasional (PTPTN).

"Secara peribadi saya tak setuju. Kalau bagi percuma ia boleh mengurangkan beban pihak tidak berpendapatan tinggi tapi orang yang mendapat sesuatu secara percuma tidak akan menghargainya," ujarnya.

Sementara itu, Dr Noor Azlan berkata, perbandingan antara Bajet 2013 kerajaan dan belanjawan pembangkang perlu dilihat dari konteks rangka kerja.

"Bajet tidak sepatutnya mengandungi terlalu banyak pemberian tapi kita lihat pembangkang lebih banyak cuba memancing (undi).

"Sesetengah orang kata baguslah kalau harga kereta turun tapi mereka mesti lihat dalam konteks lebih besar.

"Kalau harga kereta turun, lebih banyak kereta akan berada di jalan raya, menyebabkan kesesakan lebih teruk. Tapi apa yang sebenarnya kita perlukan ialah sistem pengangkutan lebih baik, bukan lebih banyak kereta," katanya.

Prof Datuk Dr Amir Hussin Baharudin dari UUM pula hairan kenapa boleh ada pihak lain yang membentangkan bajet selain Menteri Kewangan.

"Kalau boleh, saya pun nak bentangkan bajet, dapat juga saya hapuskan cukai yang tidak diperlukan," katanya.

Dr Amir Hussin juga tidak setuju dengan dasar 'Malaysia Rumah Keduaku' kerana ia me-

Headline	Rangka kerja realistik penentu kejayaan Bajet 2013		
MediaTitle	Berita Harian		
Date	02 Oct 2012	Language	Malay
Circulation	192,982	Readership	1,521,000
Section	Nasional	Color	Full Color
Page No	26	ArticleSize	300 cm ²
AdValue	RM 10,118	PR Value	RM 30,354

nyebabkan harga rumah melambung tinggi apabila warga asing dibenarkan membeli rumah di negara ini.

“Dasar itu menyebabkan harga seunit kondo di Kuala Lumpur melambung sehingga lebih RM500,000.

“Siapa yang membelinya?

Orang Singapura dan Hong Kong,” katanya.

Prof Madya Dr Fuad Mohd Jali dari UKM pula berkata, kajian beliau mendapati rakyat menerima dan menghargai transformasi kerajaan.

Katanya, responden kajian itu juga memperakui Bantuan

Rakyat 1Malaysia (BR1M), Klinik Rakyat 1Malaysia (KR1M), Program perumahan Rakyat 1Malaysia (PR1MA), bantuan sekolah dan baucar buku berjaya mengurangkan beban kos hidup golongan berpendapatan rendah dan sederhana.